



Bebbis Völkerschau

Bimbotown

Neuigkaite uss em Dschungel
2019

Hochvereerti Damen und Herre,
Mit grossem Stolz khenne mir uuseposuune,
bi unserer Schau khemme Sie nimm uss em stuune!
Sie erwartet e gwaltigs Fyyrwärgg vo Attraggitione,
mir entfiere Sie an vvyli exotische Destinatione.
Khai Uffwand isch is z'gross gsi zem Sie unterhalte,
Sie wärden unseri Schau no lang in Erinnerung bhalte.

Mir sinn immer uff dr Suechi noo dr näggschte grosse Sensation,
denn Iir entsetzt Uffschreien isch unseri greeschti Motivation.

Unsere Konkurränte seet me dr Nyyd vo wyttem aa,
will mit unseren Exponat niemer konkurriere kha.

Unseri Schau erhitzt sogar die keltische Gmieter,
Bi andere Schausteller seen Sie numme Laadehieter!

Allne voora d'Seiler-Briedere, mit iirer iible Massewaar,
ze Ramschpriise hänn sie die bsoorgt uff eme woolfaile Bazar.
Vom Hagenbeck rede mir gar nit, däm vrsteggte Mentschefrind,
är domestiziert sini Wilde wie Huusdier, es isch schlicht e Sind.

Rau und unzeemt, so wie sie sinn, wärde sie bi uns vorgfiert,
unseri Wilde sinn absolut authentisch und es isch nyt inszeniert.
Sie khemme quasi dirägg uff unseri Schaubiini uss iire Strauhitte,
leen Sie sich das nit entgoo, doorum khemme sie neecher, Bitte!




„what a man“

Meh Exotik

Dr David Livingstone hett uff sinen Expeditione gnau so Regione studiert,
sini wärtvollen Entdeggigen uffgschriiben und uff Karte transkribiert.
Das weggt nadierlig bi vyylen au dr Wuntsch noo grossartigen Abendyyr,
me will uss dr Bhääbigkait ussbräche, häll looderet s'Entdegger-Fyyr.
Sytt mir Maschiine leen fyr is schaffe mien mir nimm so sträng in Stolle,
d'Froog isch numme, was mir mit unserer neu gwunnene Zytt aafoo solle.
Die haimischi Umgääbig dunggt aim äng, e gwissi Langwyyl stellt sich yy,
uff aimoll kha's im Normalburger nimm gnueg exotisch und abartig syy.

Aber äggstra noo däm Ataputu faare zem Yygebooreni go bschaue?
Me mungglet zwar, dert haig e jeede Binggis scho yyber vierzig Fraue.
Ruggständig sinn sie jo alli bis ane Duubagg, au das isch jetzt nit nei
und wie sell me dert iberhaupt logiere, die schloofe jo alli bi de Sei.
Aber nit numme dr Bleps duet sich fyr die iiberseeisch Waar intressiere,
Au d'Medizin und anderi Wissenshafte kenne vo däne Wilde profitiere.
Ethno- und Anthropologe kenne durch sie iiri Forschig akkurat betryybe,
kennen die Wilden aalänge, ussmassen und drbyy glychwool dehaime blyybe.



früsch gwiggst

Alles geili Sieche: Unseri Kolonische-Kollege

Ass me die Horde muess im Griff ha seet dr Bsuecher uff dr erschti Spigg,
sie mien leere wo sie aanegheere, wenn neetig mit eme Gaisslezwigg!

Die ziigelloosi Art vo däne Wilde muess men unbedingt iiberwache,
mir als Kolonische hänn scho iiber Joore die Erfaarig miesse mache.

Unseri nobli und wälmännischi Haltig losst ooni Zwyyfel druff schliesse,
ass mir en europäischi Erziehig und Ussbildig hänn kenne gnesse.

Unseri eurozentristischi Yberläägehait tritt au an däre Stell klar zue Daag,
es gseet sogar e Blinde, ass uns dr Wildi bi wyttem nit s'Wasser länge mag.

Grundsätzlich mien mir vyyl grosser, in imperialistische Dimensione dängge,
worum selle mir is denn nummen uff unser aiges Territorium beschrängge?

Die wissenschaftligg Hamitentheorie vom John Hanning Speke gitt is jo Rächt,
die Wilde kenne sich nit sälber verwalte; doorum mache mir sie is zem Knächt.

Dr Ryychtum liggt dert soowisoo ungnutzt umme, mir mien en is numme hoole
und wenn's die Yygeboorene nit mergge, denn hänn mir's au nit gstoole.

Mir mien sie aifach wytterhin versegglen und sie im grosse Stil underdrugge,
wenn sie dr Uffstand Proobe, leen mir nonchalant unseri Kavallerie ussrugge.

E Sensation uss dr Wieschti


Volgg vo de Bantam Malakke

Entdeggt: In dr Wieschti Kolerios furor

Typologie: Frustrationstoleranz NULLUM

Religion: Willschgradains?

Physiognomie: In dr Regel eher glai, mumpfig und aggressiv



Grad zem aafoo hänn mir e Schogger im Aagebott,
e Stamm wo me nit in freier Wildbaan traffe wott!
Me heert die wildi Hoorde scho iiber grossi Distanze,
sie gänn sich nämmliig permanänt yybel uff e Ranze.
Die intensivi Beobachtig hett zaigt, sie bruuche die Gwalt,
nit zem Machtkämpf ussdraage, sondern aifach will's gfallt!
D'Zindschnuer isch so kurz sie isch fascht nit exischtänt,
mir nenne's kolerisch, sie woorscheinliig ihr Temperamänt.

Die glai Keerpergreessi stoot in khaim Verhältnis zer Agression,
unseri athletischi und stolzi Erschiinig schyyrt iiri Fruschtration.

Sie verfalla bi unserem Aabligg in en unglaublichi Wuet,
wo sich in dramatische, archaische Kriegstänz ussdrugge duet.
Drbyy khemme keeligi Lutt iiber iiri vor Daibi verzerrte Lippe,
es schyynt fascht so als wäre sie vom Kalunga-Ngombes gritte.

Das isch dr Gott vo de Dooten, ihn pryyse sie bedingigslos aa,
es isch en ainzigartig Speggdagel, wo me sich kuum vorstelle kha.

E Knaller uss em Dschungel

Volgg vo den Atonitte

Entdeggt: Im dichte Dschungel vo Tinitus und Drumbago

Typologie: Heersturz totalis

Religion: Huldigen em Spugg-Gneebel

Physiognomie: Grazieesi Keerperhaltig, riisigi bluetverkruschteti Oore



Dert wo aim s'Naasevelo vor lutter Dunscht beschloot,
dert wo khai Drambbelpfaad no diefer in Dschungel yynegoot,
dert huust e Volgg wo sich usschliesslig driiber duet definiere
wär s'scheenschte Staggato uff em Lepatata kha artigguliere.
Durch Wettbewärb wird dr Häuptling vom Volgg beschtumme,
wär dert nit abliiferet kha heggschtens no in Busch go drummlle.
Durch die permanänti Konkurränz herrscht e grossi Disharmonie,
wel e jede nadierlig d'Yybildig hett besser wie dr ander z'syy.

D'Attitüde wo sie an Daag leegen isch per se faszinierend,
dr Umgang mit däne Primadonne aber isserscht bemiehend.
Au ganz ussergweenlig sinn die riisigen und sensiiblen Oore,
d'Gruusle draage sie hinde lang und voorne sinn sie gschoore.
Durch d'Abschiidehait isch d'Biologie vo iinen endemisch,
was fyr iiri Lääbensart e Voordail, aber fyr uns e Problem isch.
Sie reagiere isserscht haiggel uff Veränderige vo iirer Umgääbig,
doorum erraicht numme jede Dritten unseri Velggerschau lääbig.

En Inselbrüller zem Beobachte


Volgg vo de Praejakulate

Entdeggt: Uff dr Inselgrubbe Virgin Islands

Typologie: Bunga Bunga sempre sempre

Religion: Gina Wild(er)

Physiognomie: E stattligi Keerze



Die Inselgrubbe wo mir bsuecht hänn findet me nit aifach so,
me muess e Gspyyri ha drfyyr und sich vo sine Triib laite loo.
D'Virgin Islands sinn ygymmelet in e Wulgge vo Dopamin,
hett me s'aimoll probiert, isch me dernoo sichtig wie noo Heroin.
Speetischtens wenn dr Kiil uff dr Sand lauft und nimm wytter goot,
isch dr Säägelmacht nit s'Ainzig wo stramm gegen oobe schtoot.
Sofort dien die rammligen Insulaner afoo an is ummerschruube,
aini luegt mi aa, als khennt sie e Golfball duur e Garteschluuch suuge.

Sie alli laufe fuudiblutt durch d'Geeged als wär das ganz normal,
s'Khenneleere goot numme Sekunden und scho bsoorge sie sichs oral.
Es isch e wilds jeede mit jeedem, sie sinn iiberhaupt nit verschläggt,
d'Männer länge sich gegesyttig an Rieme, als Zaiche vo Respägg.
Sie sinn sehr fryydlig, s'Bogge dient offebar au zer Leesig vo Konflikt,
meeglig, ass dr Praejakulat wien e Primat vo dr Art vo de Bonobo tiggt.
Es khunnt zue Pseudokopulationen und sogar Fächtkämpf mit em Zipfel,
d'Fraue mache gegesyttig d'Schäär und gniesses im Cocorabaumwipfel.

No nie gseh, bi uns zem erschte Mol

Volgg vo de Nam-Nam

Endeggt: Uff de Barbecue-Insle

Typologie: Mangiare Homo sapiens

Religion: Saignant

Physiognomie: Uffdunseni Ränze vom frittierte Guugelman



Do mir d'Prämisse hänn numme "comme il faut"-Waar uss-z'schtelle,
dien sich au Kannibale zue unseren erlääsenen Exponat gselle.
Uff dānen Insle sinn zwai vo unsere Forschigsgspānli verschwunde,
e paar Daag speeter hänn mir numme no iiri abgnaagte Knoche gfunde.
Uff en Art sinn sie Gourmet, denn sie wisse gnau was iine schmeggt
und in Napf khunnt numme was sie kurz drvoor no flehend aagluengt hett.
Drumm geen sie bitte nit z'nooch an Keefig und länge Sie sicher nit yyne,
sone Hand oder e Hampfle Finger khenne dānen als Apéritif erschhyne.

In den Auge vo de Nam-Nam sinn mir numme lääbigi Delikatässe,
und wenn dr Hunger z'gross wird wärde sogar die eigene Kinder gfrässe.
Ihri Filettermässer sinn so scharf wien e Schwärt vom Hattori Hanzo,
in kirzischer Zytt isch men im Jensytts und biraits fachgerächt ussgnoo.
Mit em Schliffstai wärde d'Hauer gscheerft fir s'rituelle Zeenflätsche
sie khenne mit iire gattig stargge Kiifer sogar diggi Knoche duurekättsche.
E saftigi Kolonischteplatte uff em Menuplan losst iir Härz heecher schloo,
drbyy konzentriere sie sich uff s'Kärngschäft, s'Gmies leen sie stoo.



Ihri Mainig isch is wichtig

Unseren Erfolg gitt is Rächt, aber das passt nadierlig nit allnen in Kraage, dass sinn denn die Guetmentsche wo sich iiber alles immer dien beglaage.

Sie dien alles wo bis jetzt guet und rächt gsi isch mit Drägg bewäärfe, es khunnt no sowytt ass sie sich steeren ab unsere zwyyfelhafte Goldresäärve.

Jetzt sinn mir sowytt ass sie uns au no unseri Velggerschau wänn verbiete, drbyy mechte mir numme unseri Traditionen und d'Fraid an dr Exotigg hiete.

Mir gänn Soorg zue unseren Exponat und offerieren iine e bessers Lääbe, wo sie häärkhemme hänn sie khai Perspeggtiive, wurden im Eeländ stäärbe.

Gänn Sie is numme d'Schuld und spaare Sie bitte nit mit Entrischtig und Wuet, briigle Sie unghemmt uff is yy, wenn's nummen Iir Gwisse beruuige duet.

Dien sie sich mit Mitschritter unter **#Fuckracism** solidarisieren und veraine, mir wäre sehr froh, wenn sie's am Änd vom Daag denn aber au gnau eso maine.

S'Kreftemässe vo dr Tradition mit dr Vernunft heebt bis zer hittige Zytt aa, es wär scheen und erschträabenswärt, wenn mir als Volgg wurde waggse dra.

D'Tradition sett mit dr Zytt goo, au wenn das haisst gwissi Sache z'begraabe, denn es bruucht jedi ainzelni Stimm zem klar NAI zue Rassimus z'saage!

Findsch s'Guggekonzärt nit so spannend, uns khasch es byychte, vor em Minschter seesch unseri Lambben in d'Nacht yyne lyychte!

Mechtsch au uff dr richtige Sytte schtoo, Denn settsch zue de Junge Bebbi kho.
+41 79 575 15 67 (Raphi Baumann, Obmaa Jungi Garde)

IN THE SUJETKOMMISSION WE TRUST 2019

